

Pidipenteidi **inänite Pabodo nänö cadota ante** **yewæmongainta**

Waa quëwëedäni, ante

¹ Itota Codito ingante në cæmōna inte botō tönō Tımoteo guëa apænemōna ininque botō Pabodobo adoboque yewæmōmopa. Minitō Pidipoto iñōmō quëwëninque Wængonguï quimīni inōmīni inte Itota Codito nempo në quëwëmīni iñōmīnite botō, Acæminimpa, ante yewæmōmopa. Mīni pōnencabo beyænque ante pancamīniya në aamīni iñōmīnite pancamīniya guiquënë në cæmīni iñōmīnite pancamīniya guiquënë önōmīnique iñōmīnite botō edæ, Tōmāmīni edæ acæminimpa, ante yewæmōmopa. ² Mönō Mæmpo Wængonguï mönō Awënë Itota Codito tönō waadete pönō cæda ate gänë pönëninque waa quëwëedäni, ämopa.

Në pönēmīni beyæ Wængonguï ingante
apænebopa, ante

³ Æyedēmë mīnitō imīnite ante pönëmo inte botō Wængonguï ingante waa ate pönëninque apænebopa. ⁴ İninque mīnitō beyæ ante Wængonguï ingante wantæ iñō wantæ iñō apænedinque botō, Waa quëwëmīnipa, ante watapæ tođinque apænebopa. ⁵ Edæ, Botō tāno goyedë mīnitō godongāmæ cæmīnitapa. Ayæ, Mönō Codito ingantedō ante mīnitō ñōwo ganca godōmenque watapæ apænemīnipa,

ante pönëninque botö, Wængongui bitö pönö cæbi ate pidipenteidi waa cædänipa, ante apænebopa. ⁶ Minitö botö ayömo tæiyæ waëmö entawencæminimpa, ante nê mä badongaingä inongä inte Wængongui ñöwo Itota Codito nänö ponguinganca godömenque pönö badöninque cöwê inque badongä ate minitö ædæmö pæimîni bacæminimpa. Mänömaï impa, ante botö, Nawangä impa, ante do ëñëmopa.

⁷ Mönö Codito ingantedö ante watapæ möni ëñëninö ante botö wææ äninque, Nawangä impa, ante apænebopa. Mänîne botö apæne de beyænque pancayedëña botö imote tee mönedäni wæbopa. Incæte tee mönedäni wæbo incæ, Nawangä impa, ante wææ ämo incæ Wængongui nänö waadete pönö cægäinö ante ænte entawëñömo minitö adobaï mäninö ante æninque botö tönö godongämæ entawëminipa. Ìninque, Mönö mäninö ante äanque baï entawëmö imopa, ante minitö imînite waadete pönëninque botö, Minitö ædæmö pæimîni bacæminimpa, ante nöingä cæte pönëmopa.

⁸ Itota Codito mönö imonte nanguï waadete pönengantawo. Edæ tömengä waadete nänö pönënö ante entawëninque botö minitö imînite waadete pönëmopa, ante adinque Wængongui incæ, Pabodo nawangä minitö imînite nanguï waadete pönengampa, ante apænebaingampa.

⁹ Ìninque minitö beyæ ante botö Wængongui ingante iïmaï ante apænebopa. Mîni waadete pönencabo iñömînite Wængongui pönö cæcä ate godömenque waadete pönencæminimpa. Ayæ waadete pönëmîni inte minitö, Quinö wënæ wënæ

ī, Quīnō waa ī, ante edonque adinque nō apænte
 āmīni bacæmīnimpa. ¹⁰ Mōnō æbānō cæte waa
 quēwenguī, ante edonque adinque mīnitō Ao ante
 waa quēwēninque Itota Codito nānō ponguinganca
 wentamō mongænāmaī inte tee tēwadāmaī īmīni
 incæmīnimpa. ¹¹ Ayæ Itota Codito pōnō cæcā
 ate mīnitō nō cædinque waa quēwēmīni adinque
 wadāni Wængonguī ingante waa ate pōnēninque
 apæncædānimpa, ante botō Wængonguī ingante
 apænebopa. Ayæ mīnitō mānōmaī inte waa
 cæmīni adinque tōmānāni wæætē Wængonguī
 ingante apænedinque, Wængonguī ēñēmi. Bitō
 ñāō baī ēmōnōmi inte waa pōnī cæbipa, ante
 apæncædānimpa, ante cædinque botō mīnitō beyæ
 ante Wængonguī ingante apænebopa.

Pabodo, Codito beyænque quēwēmopa, angampa

¹² Īñānāni apænebo ēñēdāni. Mānōmaī
 cædāni botō wædō incæ wīī ōnonque cætimpā.
 Wæætē, Codito beyænque Pabodo caate wæcampa,
 ante adinque wadāni godōmenque nanguī
 ināni Codito ingantedō ante watapæ mōni
 apænedō ēñēninque wede pōnēnāni badānipa.
¹³ Edæ, Codito ēmōwo apæncā beyænque
 Pabodo ingante tee mōnedānipa, ante tededāni
 ēñēninque odōmāno tæiyæ awēnē oncō wææ
 wānōnāni incæ wadāni wayōmō quēwēnāni incæ
 tōmānāni do ēñēnānipa. ¹⁴ Mōnō Awēnē nempo
 quēwēnāni incæ, Pabodo tee mōnete wæcampa,
 ante wædinque wodo tōmānāni godōmenque wede
 pōnente badānipa. Īninque wede pōnēninque tæī
 piñænte entawēninque tōmēnāni guīñēnāmaī inte

Wængonguī nānō apænedō ante godömenque apænedānipa.

¹⁵ Pancadāniya, Pabodo miñæ godömenque nanguī ināni godānipa, ante pönō piinte adinque Codito emōwo ante apænedāni incæte botō imote guëadō guëa piincæte ante apænedānipa. Mänömaï i incæte wadāni guiquënë, Pabodo tönō mönō godongāmæ cæcæimpa, ante gänë pönëninque Codito emōwo ante apænedānipa. ¹⁶ Në gänë pönente apænedāni guiquënë, Codito ingantedō ante watapæ mini eñëninō ante Pabodo wææ ancæcæimpa, ante botō imote godō gö cæcampa, ante do eñënanipa. Ìninqe tömënanī botō imote waadete pönëninque apænedānipa. ¹⁷ Në wæætedō wæætë tededāni guiquënë, Pabodo tee mönete wæyongante mönō apænete tomō wæcä tocæi, ante cædānipa. Tömënanī nāmā beyænque ante cædāni incæte waa cæte bai cædinque Codito emōwo ante apænedānipa. ¹⁸ Incæte pancadāniya nāmā beyænque ante apænedāni incæ pancadāniya nō pönente apænedāni incæ mänināni tömānāni Codito nānō cægainō ante nāwangä ante do edæ apænedānipa. Mänömaï impa, ante pönëninque botō watapæ tobopa.

Ayæ iimaï ante pönëninque cöwë godömenque nanguī tocæboimpa. ¹⁹ Minitō Wængonguī ingante botō beyæ nanguī apænemini eñëninque Itota Codito Önöwoca pönō cæcæcæimpa, ante eñente tobopa. Ìninqe ñöwo botō caate wædō ante edæ iincayæ ate ñimpo cædāni ate edæ botō abæ tawænte gote quëwenguinque edæ impa, ante do eñëninque tobopa. ²⁰ Botō wëenëñedë botō

cæbo bai ñowo adobai cæinëmo ïmopa. Ìntai ëñate miiimö quëwëmo incæ baonque wænönäni wæmo incæ, Mönö Codito ingante waa acedänimpa, ante cædinque botö cöwë guiñënämaï inte tæi ongöninque nanguï cædinque watapæ edæ bacæboimpa, ante pönëmopa. ²¹ Edæ inguipoga quëwëmo incæ botö Codito ingante entawëninque tömengä beyænque ante quëwëmopa. Wæætë wæmo incæ tömengä beyæ botö godömenque nanguï entawenguïmo ïmopa.

²² Incæte, Waiwæ nanguï incate bai botö cæquinque inguipoga ayæ quëwenguënëmo ïmopa, ante pönëninque botö, Æbänö anguïmoo, ante ëñencæte ante wæbopa. Edæ, Wæncæboimpa, ante anguënëmo ïmoo. Wæætë, Ayæ quëwencæboimpa, ante anguënëmo ïmoo. Edæ, Æbänö anguënëmo ïmoo, ante botö edæ ëñënämaï ïmopa. ²³ Edæ wada bæi ongonte æmataë töö æmataë töö godöna wæcä bai wädömo inte botö, Ædönö gämænö goquïmoo, ante wæbopa. Codito weca godömenque waëmö pönï quëwencæboimpa, ante botö wadæ goinëmo ïmopa. ²⁴ Incæte inguipoga quëwëninque minitö beyænque ante cæquënëmo inte botö ædö cæte wayömö goquïmoo. ²⁵ Ante pönente wædinque botö, Minitö mönö pönënö ante godömenque wede pönëninque watapæ tote quëwencæminimpa, ante cæquïmo ïmopa, ante ëñëmopa. Ayæ, Ñowo wænämaï inte botö minitö weca quëwenguïmo ïmopa, ante do ëñëmopa. ²⁶ Ìnque botö miiimo inte minitö weca pömo adinque minitö Itota Codito ingante waa adinque botö beyænque nanguï tocæminimpa.

²⁷ Codito ingantedö ante watapæ mönō ēñēnīnō beyæ ante mönō waa cæquēnēmō ïmompā, ante ēñēmīni inte mīnitō edæ waa cæte quēwēedāni. Mānōmaī cæmīni ïnīnque botō ōnōmoncaque ēñēmo incæ mīnitō weca ponte abo incæ, Pidipenteidi adoyōmō pōnēnīnque tæī ongōnānīpā, ante tededāni ēñēnīnque tobaīmopā. Ayæ, Codito ingantedö ante watapæ mönō ēñēnīnō ante wadāni ēñēcædānīmpā, ante pidipenteidi ïñacabo cædīnque nanguī cædānīpā, ante botō edæ ēñēnte tobaīmopā. ²⁸ Ayæ pīinte cædāni incæte mīnitō wæætē guīñēnāmaī inte tæī ongōmīnīpā, ante adīnque botō tobaīmopā. Mīnitō mānōmaī guīñēnāmaī inte tæī ongōmīni ate wædīnque nē pīinte ānāni wæætē, Mōnitō wænguīnque impā, ante wæcædānīmpā. Nē pōnēmīni mīni quēwenguīnque impā, ante adīnque tōmēnāni godōmenque wæcædānīmpā. Edæ Wængonguī ængā beyænque quēwencæmīnīmpā.

²⁹ Wængonguī waadete pōnō cæcā ate mīnitō Codito ingante wede pōnēmīnitawo. Edæ adocā pōnō cæcā ate mīnitō Codito beyænque cædīnque cōwē caate wæquīmīni ïmīnīpā. ³⁰ Pabodobo doyedē Codito beyæ ante wææ ancæte ante caate wætabopā, ante amīnitawo. Ñōwo godōmenque wææ cædīnque caate wæbopā, ante ōnōmoncaque ēñēmīnitawo. ïnīnque botō wææ ānīnque caate wæbo baī mīnitō adobaī botō tōnō godongāmæ wææ ānīnque caate wæmīni ïmīnīpā.

2

Codito ōnonganque bayongante Wængonguī da

æænongä

¹ Mönö Codito nempo quëwëninque mīnitō wampo pönēmīnitawo. Tömengä waadete pönengä beyænque gancæ pönēmīnitawo. Mönö Codito Önöwoca tönö äawocaque bai ëwocadinque godongämæ watapæ quëwëmīnitawo. Nē wæcä ingante godö waadete pönēmīnitawo. Adocanque wæwengä adinque mīnitō äanque bai wæwëninque tömengä beyæ cæmīnitawo. ² Mänömaï i ïninque adodonque pönëninque mīnitō waa waademīni adinque botö watapæ pönī tobaïmopa. Tömämīni äanque bai ëwocadinque, Mönö adoyömö cæcæïmpa, ante godongämæ cæmīni adinque botö godömenque nanguï watapæ tobaïmopa. ³ ïninque mīnitō nämanque ante pönëninque, Botö ïmote waa acædänimpa, ante cædämaï iedäni. Yæcado ongoncæboïmpa, ante cædämaï iedäni. Wæætë, Botö önömoque bai ïñömote wadäni wæætë waa pönī ïnänipa, ante pönëninque wadänique ïnänite ængö cæedäni. ⁴ Nämä mīni cæinënö ante cædinque mīnitō wīi mäninonque ante cædinque wæætë edæ wadäni nāni cæinënö adobai ante cæedäni.

⁵ Mänömaï cædinque mīnitō Itota Codito nänö pönengainö bai adodö ante pönëedäni.

⁶ Tömengä ïñömö cöwë näwä Wængonguï ïnongä ingampa. Incæte, Botö näwä Wængonguïmo ingaïmo inte

Mæmpo Wængonguï ganca botö ingainö ante ñimpo cædämaï incæboïmpa, ante tömengä änämaï ingacäïmpa.

⁷ Wæætë edæ, Mäninö botö ingainö incæ botö edæ ñimpo cæcæboïmpa, äninque wææ, önonganque bai bagacäïmpa.

Ayæ, Wængongui ingante nē cædōmo edæ
bacæboimpa, ante badinque wææ,
tōmengä waomō mōnō emōnō bai nānō
emonguinque waocä eñagacäimpa.

8 Mänōmai eñate pæte wææ tōmengä ononganque
inte bai cæyongä Wæmpocä,
Bitō wænguinō taadō gocæbiimpa, angä eñëninque
edæ Ao ante goyongante wææ,
tōmengä nānō guiñëñaquinque awæ ñænquedimæ
cæte māo timpodāni wææ tiwadāni ate
tōmengä caate wægōninque wææ bacaa edæ
wængacäimpa.

9 Mänōmai cæcä adinque Wængongui wæætē
tōmengä ingante æmonga pōni da
æænongacäimpa.

Ayæ wadāni emōwo onōwoque emōnāni bai tōmengä
Tæiyæ Awënë inongä inte wii adobai
onōwoque bai emoncæcäimpa, ante cædinque
Wængongui edæ, Itota Codito ingampa, ante
pōnō pemongacäimpa.

10 Edæ öönæde quëwënāni incæ inguipoga
quëwënāni incæ guimonga quëwënāni incæ
tömānāni edæ Itota emōwo eñente waa adinque
da guicapocädänimpa, ante Wængongui tōmengä
ingante pōnō pemongacäimpa.

11 Ayæ, Itota Codito ingante adinque tömānāni,
Mōnō Tæiyæ Awënë inongä ingampa, ante edæ Ao
ancædänimpa, ante Wæmpocä cægacäimpa.
Mänōmai cæcä adinque, Mæmpo Wængongui waa
pōni cæcampa, ante mōnō edæ watapæ
apænecäimpa.

Nëmoncoo äo äo cædote bai nöinō cæte quëwëedāni

12 Mänömaï beyæ botö nē waademini iñömīnite botö apænebo eñeedāni. Minitö weca botö quēwēnedē mīnitö do eñente cædimini inte ñöwo botö wayömö quēwēmo incæ godömenque eñente cæmīni abopa. Ìnīnque cōwē mīni eñente cædinö baï adobaï cædinque ñöwo mönö watapæ quēwenguinö taadonque gocæte ante cædinque, Oda cæte wæcæ wæ, ante cōwā aquēnē quēwēmīni. 13 Wīi cæinente awædö, ante wæmīnitawo. Edæ Wængonguinque apænecä eñente entawēnīnque mīnitö tömengä waa pönī nänö änö ante nē eñente cæinēmīni bamīnīpa. Oda cæte awædö, ante wæmīnitawo. Adocä Wængonguinque mongæncadæ mongæncadæ cæcä ate tæi piñæmīni bate ate eyepæ cæmīnīpa.

14 Ìnīnque, Wīi cæinente awædö, ante änāmaï inte mīnitö piyænē cæte mīni cæquēnēnö ante do cæedāni. 15 Edæ mänömaï cæmīni adīnque wadāni, Wentamö mongænāmaï imīnīpa, ante abainānīpa. Ayæ inguipogaque quēwēnāni eñēnāmaï inte idiquibæ pönente cæyönāni mīnitö wæætē Wængonguī wēñæmīni inömīni inte tömēnāni weca quēwēnīnque nēmōncoo äo äo cædote baï nöingä cæte quēwencæmīnīmpa. 16 Edæ, Codito pönö cæcä beyænque mönö quēwengæimpa, ante edonque apænēmīni eñencædānīmpa. Ìnīnque, Doyedē botö apænedö ante mīnitö nē eñente cæmīnīpa, ante adīnque botö nanguī todīnque iīmaï ante pönēmopa. Mīnitö beyæ pæ pagænte cædōmo incæte botö wīi önonque cæboimpa. Wæætē mönö Codito nänö ponguïönæ iñonte botö, Mīnitö nö apænēmīnitapa, ante adīnque botö tocæboimpa. 17 Ayæ, Wængonguī quī, ante baö

godöninque waodäni baonga tepæ gao caadänipa. Minitö iñömö wede pönëmini inte, Wængonguï quï, ante nämä godö cæyömini botö quëwenguimämo incæ mïni godöincooga gao caate bai ba edæ waa tobaïmopa. Minitö tönö godongämæ edæ tobaimpa. ¹⁸ Minitö adobaï, Pabodo mönö beyæ cæcampa, ante tocæminipa. Edæ mönö edæ godongämæ tocæimpa.

Timoteo tönö Epapododito

¹⁹ Minitö æbänö quëwëminii, ante ëñëninque Timoteo wæætë apænecä ëñente tocæboimpa, ante cædinque botö, Itota Codito Ao angä ate Timoteo ingante oo da pönömo minitö weca poncæcäimpa, ante pönëmopa. ²⁰ Minitö æbänö quëwëminii, ante wæyömo tömengä adocanque minitö beyæ ante botö tönö guëa wæcampa. Wadäni guiquënë minitö beyæ ante wädämaï inänipa. ²¹ Tömänäni edæ nämä beyænque ante cæinente wædinque Itota Codito nänö änönö ante wïi cæinänäni inänipa. ²² Cöwä ayömini, Timoteo iñömö cöwë waa cæcampa, ante do ëñëminitapa. Ayæ mönö Codito ingantedö ante watapæ apænedinque Timoteo tönö möna wencaya bai guëa cæmönapa, ante do ëñëminitapa. ²³ Ìninqe, Botö imote awënëidi æbänö apænte anguinänii, ante ëñente ate botö Timoteo ingante mäniñedë ate minitö weca do da pönömo poncæcäimpa, ante pönëmopa. ²⁴ Ayæ mönö Tæiyæ Awënë Ao angä ate tömëmo do pömaïmopa.

²⁵ Ayæ Epapododito mönö tönïñacä incæ botö tönö guëa cæmöna imönapa. Wadäni püinte cædäni adinque mönatö guëa wææ cæmönapa. Tömengä ingante minitö, Pabodo beyæ ante

godö cæcæbiimpa, ante do da pönömīni ponte cæcä æntabopa. Tömengä ingante ñowo wæætē adodö mīnitö weca edæ da pönömo ponguēnengä ingampa, ante pönēmopa. ²⁶ Adocä Epapododito iñömö mīnitö pidipenteidi imīnite acæte ante edæ nanguī wæcampa. Ayæ, Epapododito daicawo gawængampa, ante apænedāni eññinque pidipenteidi do wædānipa, ante eññente wædinque tömengä wæætē mīnitö beyæ ante nanguī wæwente bacampa. ²⁷ Nāwangä impa edæ. Tömengä daicawo gawænte wodo wængantapa. Incæte Wængonguī tömengä ingante waadete pönö gampocä waa bacantapa. Mänömaī cædinque Wængonguī botö beyæ adobaī ante pönëninque, Pabodo wīi godömenque wæcæcäimpa, ante pönengä inte edæ Epapododito ingante gampocä waa bacantapa.

²⁸ Mänömaī beyæ, Epapododito wæætē pongä adinque tocæmīnimpā, ante cædinque ayæ, Mīnitö tomīni adinque botö wæwēnāmaī bacæboimpa, ante cædinque botö tömengä ingante ñowo da godoncæboimpa, ämopa. ²⁹ Pongä ate mīnitö, Mönö Awēnē nempo quēwēnōmi inte pöe, äninque Epapododito ingante waa adinque godongämæ watapæ tote cæedāni. Ayæ wadāni tömengä bai adobaī waa cædānipa, ante adinque tömēnāni inānite waa adinque waa cæedāni. ³⁰ Mīnitö, Pabodo beyæ ædö cæte cæquimōnii, ante, Gobæ awædö, ante wæyömīnite Epapododito iñömö edæ, Wæmo incæ cōwē cæcæboimpa, ante mīnitö cæquēnēnō ante cæcantapa. Codito beyæ ante cæcæte ante edæ tömengä wodo wængantapa cæmīnii. Tömengä ingante edæ waa cæedāni, ämopa.

3

Tæi piñcente cæcæimpa, ante

¹ Ñowo iñömö botö tönĩñamĩni eññedäni. Mönö Awënë nempo quëwëninque mĩni watapæ toquinque imĩnipa. Minitö oda cædämaĩ incæmĩnimpa, ante botö adodö adodö ante ancaa yewæmömo incæte wædämaĩ imopa.

² Iĩmaĩ ämopa. Wadäni iñömö, Mönö eö togænte quëwengæimpa, ante nē änewënäni inte guintaidi bai wënæ wënæ cædinque nämä baö eö eö towënänipa. Ante adinque mĩnitö tömënäni inänite gomö adinque wææ cædäni. ³ Edæ tömënäni inänite ee adinque Wængonguĩ mönö imonte wæætë pönö eö togænte bai cædinque mönö wentamö mongænö do wido cægacäimpa. Wængonguĩ Önöwoca ingante ænte ewocamö inömö inte mönonque edæ, Wængonguĩ ingampa, ante tömengä beyæ cæmompä. Itota Codito nempo quëwëmö inte mönonque wĩ inguipoga beyænque quëwëmö imompä, ante mönö tömengä ingante waa ate apænemompä. ⁴ Tömënäni guiquënë inguipogaque ante pönëninque, Mönitö cædö beyænque quëwencæmönimpä, ante pönëwënänipa. Tömënäni nāni pönëwënö bai adobai pönente bai botö, Tömënäni wædænque cæyönäni botö godömenque nangui cædömo imopa, ante pönëwencædömoimpä. Edæ, Nanguĩ botö cædö beyænque quëwencæboimpä, ante pönëwencædömoimpä.

⁵ Edæ tömënäni nē eö togæināni inänitawo. Botö iñömö adobai imopa. Tæcæ eññayömote önompo æmæmpoque go mëönaa go adoönæque

mānimpoönæ iñonte botō imote do eō togænāni wægaboimpa. Tömēnāni idægoidi inānitawo. Botō iñōmō idægo wodi pæimo inōmo inte tömengä nānōmocā Beencamīnō wodi pæimo inōmo imopa. Tömēnāni ebedeoidi inānitawo. Botō iñōmō ebedeobo eñagaimo inte nāwā ebedeobo inōmo imopa. Tömēnāni Paditeoidi inānitawogaa. Edæ botō Paditeobo inōmo inte Mōitee wodi nānō wææ angainō ante mōni Paditeocabo wædō ante tōmāā eñente cædōmo imoi aedāni. ⁶ Ayæ tömēnāni, Wængongui beyæ nanguī cæcæimpa, ante apænedānitawo. Edæ, Wængongui beyæ cæbote, ante edæ botō iñōmō doyedē Codito ingante nāni pōnengaincabo inānite ancaa togænte pancæte ante cægaboī aedāni. Ayæ oodeoidi guiquēnē, Mōnitō wææ angainō ante nē eñente cædānique nē nō cædāni inānīpa, ante änānitawo. Botō iñōmō edæ māninonque ante cōwē cædōmo inte wentamō mongænāmaī inōmo imopa.

⁷ Doyedē iñōmō botō mānōmaī godōmenque waa cædīmo inte, Botō toquinque waa pōnī cægaboimpa, ante pōnēwentabopa. Nōwo guiquēnē botō waa cægainō ante, Ōnonquedō ante cægaboī, ante do eñēmopa. ⁸ Ayæ wææ, Itota Codito botō Awēnē ingante adīmo inte botō tömengä ingante pōnēninque tömengä tōnō godōmenque waa pōnī quēwencæboimpa, ante botō, Wēēnēñedē botō entawengaincoo botō waa againcoo incæ edæ ēwenguincooque impa, ante pōnēmopa. Edæ Codito beyæ ante cæyōmo botō wēēnē mānincoo tōmancoo edæ dæ ba wætabopa. Īninque, Codito ingante godōmenque ēwocacæboimpa, ante nanguī cædinque botō, Wēēnē botō entawengainō ompotacoo bai

impa, ante wido cæbopa.

⁹ Edæ, Īimai cæedāni, ante nāni wææ angainō ante ēñente cæbo incæte Wængonguī ayongante botō ædō cæte mǎninō beyænque nō entawēmo baquimoo. Wæætē Codito mōnō nē nō cædongā ingante wede pōnēmo inte tōmengā nempo quēwēñomote Wængonguī pōnō badongā ate nō cæbo bacæboimpa, ante nanguī cæbopa.

¹⁰ Mōnō Codito ingante ate bai pōnencæboimpa, ante cæbopa. Ayæ tōmengā adocā nanguī tæi piñænique ñāni òmæmongacāimpa, ante wede pōnēnique botō mǎninō tōmengā nē ñāni òmæmongaingā nānō tæi piñænō bai adobai entawencæboimpa, ante cæbopa. Ayæ adobai, Tōmengā caate nānō wængai bai botō tōmengā beyæ wæncæboimpa, ante pōnēnique botō tōmengā tōnō godongāmæ caate wænte bai tōmengā nānō ēwocadō bai ēwocacæboimpa, ante cæbopa. ¹¹ Mǎnōmai cædinque botō, Tōmengā wænte ate ñāni òmæmonte nānō quēwengai bai botō adobai wænte ate ñāni òmæmoncæboimpa, ante nanguī cæbopa.

Mǎnōmai bacæboimpa, ante nanguī cæbopa, ante

¹² Mǎnōmainō ante apænedinque botō, Codito nānō entawēnō bai do entawēmopa, ante dicæ apænebogaa. Picænāni bai do badinque nō cædinque oda cædāmai ĩmopa, ante dicæ apænebogaa. Incæte Itota Codito incæ edæ, Botō ēwocadō bai adobai ēwocacæbiimpa, ante botō ĩmote do bæi ongongacāimpa. Īinique botō wæætē, Tōmengā waa pōni nānō ēwocadō bai adobai ēwocacæboimpa, ante bæi ongoncæte ante

nanguï cæbopa. ¹³ Ìñänäni ëñëedäni. Botö Codito nänö ewocadö ante dicæ eyepæ æmogaa, ante wæbopa. Incæte, Eyepæ ænämaï imopa, ante adinque wæwënämaï imopa. Wæætë, Ìncayæ ate Codito nänö ewocadö bai ædæmö ewocacæboimpa, ante cædinque botö mäninonque ante pönëninque pogodo gote bai cöwë cæbopa. ¹⁴ Wængonguï do, Bitö Itota Codito nempo quëwënömi inte eyepæ cædinque æmonga ponte æe, ante botö imote aa pegacäimpa. Ìninqe tömengä, Pædæ pönömo æncæbiimpa, ante nänö angaincoo ante ænte ewocacæte ante botö gänä cæcæte ante pogodo gote bai edæ nanguï cæbopa.

¹⁵ Mönö æmäwo picæmö badömö ìñömö tömämö adobainö ante pönenguënëmö imopa. Pancamïniya guiquënë mänömainö ante wïi pönëmini adinque Wængonguï, Minitö æbänö nö pönenguënëmini iminii, ante pönö odömongä ate ëñencæminimpa. ¹⁶ Mönö do ëñente quëwenganca mäninganca mönö cöwë nö cæte quëwengæimpa.

¹⁷ Ìñänäni ëñëedäni. Botö Pabodobo æbänö cæboo, ante adinque mïnitö botö cædö bai adobai godongämæ cæedäni. Ayæ, Mönitö cæmöni bai mïnitö adobai cæedäni, ante odömömöni bai pancadäniya adobai cædäni adinque mïnitö ìñömö, Adobai cæcæimpa, ante tömënäni inänite cöwä aedäni. ¹⁸ Minitö iminute wantæ wantæ ìñö wantæ wantæ ìñö apænedimo inte botö ñowo Ca ca wædinque adodö ante iïmaï ante godömenque apænebopa. Mönö Codito awäa wængä incæte nanguï inäni tömengä ingante Baa äninque tömengä nänö wængaiwæ ante piinte bai cædänipa, ante awædö. ¹⁹ Tömënäni nani ömæe ewente wæquinque

mänömaï cædänipa. Cænguï beyænque ante pönente quëwënanipa. Wënæ wënæ nāni cædö beyæ guingo imonte wæquënänāni incæ tōmënāni wæætë guĩñëñadāmaï inte edæ, Waa pōni cæmōnipa, ante nāmā incæ waa adänipa. Edæ ingui-poga beyænque ante cæinente wædänipa.

²⁰ Mönö iñömö mem-poga ëñagaimö inte mönö öönædë ömæ do ëamö edæ imompa. Ìnque mönö Awënë Itota Codito, Quëwencæminimpa, ante në Ængaingä ingante nanguï aïnente wædinque mönö, Tömengä æyedënö öönædë edæ wææ ponguingä, ante wänö cōmompā. ²¹ Tömengä iñömö tæï piñænongä inte tōmancoo edæ bæ tadinque ö æninque Tæiyæ Awënë incæcäimpa. Ìnque, Mönö quëwenguināmaï aquĩñö ëñamompa, ante adinque tōmengä tæï piñænongä inte, Botö baö bai tæiñö mongæncæminimpa, ante badongä ëñaquimö imompa.

4

Mönö Awënë nempo quëwëninque watapæ toccëimpa

¹ Wængonguï botö imote poganta pönö wencate bai cædinque, Bitö waa apænebi ëñente beyænque pidipenteidi ëñente waa cædāni abopa, angä ëñëninque botö mīnitö beyæ ante watapæ tobopa. Mīnitö imīnite ædæmō waadedinque botö, Æyedënö bee tenguimoo, ante wæbopa. Ìnque botö në waademini ämo ëñëedāni. Māninö botö āninö ëñente cædinque mīnitö mönö Awënë nempo quëwëninque tæï ongöedāni.

² Ñöwo Eodia, Tintique, mīna onquiyæncaya ĩmĩnate ämo ëñēeda. Mönö Awënë nempo quëwëninque mĩnatö piyænë cæte adodonce ante cæbæweda, ämopa. ³ Botö mönö Awënë ingantedö ante watapæ apænecæte ante nanguĩ cæyömote Codëmente tönö wadäni botö tönö ĩñacabo cædänitapa. Wængonguĩ, Nāni quëwenguĩta, ante tömengä nänö yewæmongaintaa tömënāni ëmowo dobæ yewæmonte mæ õñompa. Tömënāni botö tönö cæyönāni ĩina onquiyæna Eodia tönö Tintique ĩñömö botö tönö adobaĩ ĩñacabo nanguĩ cæda ĩnatapa. ĩnĩnque bitö cöwë botö tönö guëa cædömi ĩñömite bitö ĩmite ämopa. ĩina ĩnate bitö waadete apænebi ëñëninque piyænë cæte quëwencædaĩmpa.

⁴ Ayæ tömämĩni ĩmĩnite, Mönö Awënë nempo quëwëninque watapæ tote quëwëedäni, ämopa. Edæ, Watapæ pönĩ tote quëwëedäni, ante adodö ante ämo ëñëedäni. ⁵ Mönö Awënë edæ oo pönĩ poncæcäĩmpa cæmĩnii. Ee ædæmö cæte quëwëñömĩni tömänāni waadete mĩni cædönö ante edonce acædänĩmpa.

⁶ Ayæ, Quiëmë bacæ wæ, ante mĩni wædö ante guĩñente wædämaĩ ĩedäni. Wængonguinque ingante apæneedäni. Apænedĩnque, Wængonguĩ, bitö pönö cæbi ate eyepæ ĩnte quëwencæmönĩmpa, ante quiëmë mĩni æncæ wædö incæ ante apænecæmĩnĩmpa. Ayæ tömengä pönö cæcä adĩnque mĩnitö, Bitö pönö cæbi waa æmönĩpa, ante Wængonguĩ ingante wæætë waa ate pönente apæneedäni. ⁷ Ayæ, Wængonguĩ piyænë cædĩnque pönö aacä beyæ mĩnitö Itota Codito nempo quëwëninque piyænë cædĩnque mĩmönë wædämaĩ ĩnte nö pönëninque quëwencæmĩnĩmpa. Edæ

mönö, Æbämē cæte Wængongui pönö piyænē cæte aacää, ante mönö waocabo eññämaï imö incæte tömengä cöwē godömenque aacä ate wädämaï inte quëwëmompä.

Quinö waa i, ante mäninonque ante pönëë cöedäni, ante

⁸ İñänäni eññeedäni. Minitö æbänö ante pönëë conguenëmini iminipa, ante yewæmöninque botö ñowo æmæwo pöni yewæmömoi aedäni. Näwangä näni apænedö ante pönëë cöedäni. Æbänö waa cæquii, æbänö nö cæquii, ante pönëë cöedäni. Quiënö nö i, ante mäninö ante pönëë cöedäni. Mönö æbänö waadete pönenguui, ante pönëninque mönö waa adoncoo ante adobaï pönëë cöedäni. Wadäni waa näni cædinö ante pönëë cöedäni. Mänömaï cædäni ate wadäni waa adänitawo. İninque tömënäni näni waa adinö ante minitö mäninö ante pönëë cöedäni. İninque, Quiëmë waa pöni i, ante adinque mäninonque ante pönëë cöedäni.

⁹ Botö odömonte apænebo eññëminitawo. İninque botö pönö apænebo eññëninque mini eññëninö bai tömänö ante edæ cæedäni. Botö pædæ pönömo æminitawo. İninque botö pædæ pönömo mini æninö incæ ee mäedäni. Botö entawënö ante, Æbänö entawëmoo, ante edonque aminitawo. İninque botö entawënö mini adinö bai minitö adobaï entawëninque edæ waa cæedäni. Mänömaï cæmini adinque Wængongui nē gänē pönëongä inte minitö tönö godongämæ quëwëninque pönö cæcä ate minitö wæætë gänë pönëmini bacæminimpa.

Pidipenteidi mini pönöni waa æntabopa, Pabodo angampa

¹⁰ Botö wædö ante minitö doyedë pönö cædimini inte ñowo wæætë tæcæ pönente wædinque wæætë pönö cæmini æninque botö, Mönö Awënë beyænque pönö cæminipa, ante adinque nangui waa tobopa. Edæ botö wædö ante cöwë waadete pönëmini incæte minitö da pönoncæ cæyöminite wææ cæte i æiquedö da pönonguimīni. ¹¹ Incæte mänömaï apænedinque botö wii ænguënëmo inte apænetabopa. Edæ wædænque ëabo incæ nanguï ëabo incæ quiëmë ëabo incæ botö, Æbänö quëwenguï, ante do ëñëmo inte edæ piyænë cæte wædämaï cöwë quëwëmopa. ¹² Ömæpobo wædimo inte botö, Ömaadäni æbänö quëwënanii, ante do ëñëmopa. Adobaï nanguï ëate quëwënimö inte botö, Nanguï ëadäni æbänö quëwënanii, ante do ëñëmopa. Edæ tömo cæmo incæ, gæwænte wæbo incæ, nanguï ëabo incæ, ömæpobo incæ mäninö tömänö ante wægäimo inte botö mänömaï ingäimo beyænque ëñente batabopa. Ìninque æyömömë quëwëmo incæ quiëmë baï quëwëmo incæ piyænë cæte wædämaï quëwëmopa. ¹³ Edæ quiëmë beyæ wæbo incæ mönö Codito pönö cæcä ate botö wæætë edæ eyepæ entawëninque tömäa edæ cæbopa.

¹⁴ Incæte botö ömæpobo inte wæyömote minitö pönö cæmini waa æntabopa. ¹⁵ Ayæ adobaï mönö Codito ingantedö ante watapæ möni apænedö ante tæcæ ëñëmini ate botö Mäatedöniabæ ïinque apænedinque wadæ goyömote wadäni Codito ingante nani godongämæ pönencabo pönönämaï iñönänite minitö adomīnique da

pönömīni æntabopa, ante mīnitō pidipenteidi do ēñēmīnīpa. ¹⁶ Edæ, Tetadōnica nāni quēwēñōmō quēwēnīnque Pabodo ōmæpocā bacampa, ante tededāni ēñente wædīnque mīnitō wīī adopoque wæætē wæætē da pönömīni æntabopa.

¹⁷ Botō dicæ botō æncæ wædō ante apænetabopa. Wæætē, Pidipenteidi wadāni īnānite nē godōnāni īnānīpa, ante adīnque Wængonguī wæætē mīnitō īmīnite godōmenque pōnongā æncæmīnīpa, ante apænetabopa.

¹⁸ Īnīnque botō īñōmō idæwaa æntabopa. Botō ænguēnēnō ænīnque godōmenque nangūī ænte ēabopa. Edæ, Pabodo quī, ante mīni da pönōnīncoo Epapododito wæætē botō īmote pædæ pōnongā ænīnque botō eyepæ pōnī ēate quēwēmopa. Mīnitō, Wængonguī quī, ante oguī waquī baī pönō iya tante baī cædīnque, Pabodo quī, ante da pönömīni adīnque, Waa pōnī pönömīnīpa, ante Wængonguī incæ waa acampa. ¹⁹ Botō Wængonguī ñāō baī entawēnīnque tæī ēmongā īnongā inte tōmengā nānō ēadoncoo īñōmō edæ bacoo pōnī ongompa. Īnīnque, Mīnitō ænguēnēmīni īmīnīpa, ante adīnque tōmengā Itota Codito beyænque cædīnque eyepæ pōnī edæ da pōnongā æncæmīnīpa.

²⁰ Mōnō Wængonguī mōnō Mæmpo īñongante, Bitō waēmō pōnī īnōmi īmīpa, ante mōnō cōwē watapæ apænecæīmpa. Edæ ñōwopāmo incæ mīīmāmo incæ mōnō cōwē mānōmaī apænecæīmpa. Mānōmaī impa, ānīnque botō, Amēē, āmopa.

Mānīnque ante yewcēmōmopa, ante

21 Wængonguï quïnäni Itota Codito nempo quëwënönäni iñönänite mïnitö, Waa quëwencæminimpa, ante botö beyæ ancæminimpa. Ayæ botö tönö godongämæ ongönäni incæ, Mïnitö æbänö quëwëminii, ante wädänipa. 22 Edæ Tæiyæ Awënë Tetædo oncönë quëwënäni tönö wadäni Odömä iñömö wayömö quëwënäni tönö Wængonguï quïnäni incæ tömänäni adobaï mïnitö imïnite, Waa quëwencæminimpa, änänipa.

23 Mönö Awënë Itota Codito mïnitö imïnite waadete pönö cæcæcäimpa, ämopa. Mäninque ante yewæmömopa.

Wængonguī nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9bedab5a-39ff-5163-a35b-8056cbbe8690